


August 29, 2009 - Hinahamon kita, Carlo J. Caparas!



If you like this post, please **subscribe to the RSS feed**. *N.B. ? This was published in the August 28-September 3, 2009 issue of Pinoy Weekly, the full text of which may also be retrieved from <http://pinoyweekly.com/hinahamon-kita-carlo-j-caparas/>.*



Konteksto
Danilo Araña Arao



Hinirang ka ng mga nasa kapangyarihan, pero hinarang ka ng maraming galit na mamamayan. Mas pinili kong hamunin kaysa batiin ka sa pagkakasingit ng pangalan mo sa listahan ng mga tatanghaling Pambansang Alagad ng Sining (National Artist). Huwag ka na ring magulat kung isa ako sa maraming natuwa nang magbigay ng *status quo order* ang Korte Supreme na pumigil sa paggawad ng titulo sa iyo, kasama ang tatlo pang indibidwal (Cecile Guidote-Alvarez, Francisco "Bobby" Mañosa at Jose "Pitoy" Moreno) na pinili lang ng Malakanyang na gawaran ng pinakamataas na karangalan ng bansa.

Sa loob ng napakahabang panahon, inisip kong kailangan mong maging dalubhasa sa iyong larangan para tanghalin kang Pambansang Alagad ng Sining. Ito ay pagkilala sa iyong kontribusyon sa pagpapaunlad ng kultura ng bansa. Dahil dito, inakala kong kailangang may mataas na kalidad ang lahat ng mga obra para pumasa sa mataas na pamantayan ng iba pang respetadong kasamahan sa napili mong larangan.

Mali pala ako. Sabi mo kasi, Ginoong Carlo J. Caparas (hinirang ng Malakanyang na National Artist for Visual Arts and Film), may pagkakaiba ang "*national artist*" sa "*sectoral artist*." Ayon sa iyo, mayroon daw mga nahirang na National Artist noon na hindi kasing-sikat mo at kilala lang sa maliit na sirkulo ng mga tao. Angat ka raw sa iba dahil kilala ka sa buong Pilipinas.

Sa ganitong konteksto mo ipinaliwanag kung bakit hindi ka pumasa nang dalawang beses sa masusing proseso ng Cultural Center of the Philippines (CCP) at National Commission for Culture and the Arts (NCCA). Puro elitista raw kasi sila. Para sa iyo, ang mahalaga'y nakuha mo ang suporta ng Malakanyang, lalo na ni Pangulong Gloria Macapagal-Arroyo na ikinampanya mo noong 2004 at nagbigay sa iyo ng Presidential Medal of Merit noong 2007.

Wala namang debate sa kasikatan mo, at aaminin kong lumaki akong binabasa ang ilan sa 800 nobelang pangkomiks na sinulat mo. Bago pa man isinapelikula ang *Totoy Bato* at *Ang Panday*, sinubaybayan ko na ang mga ito sa komiks. Noong nasa elementarya pa ako, napabilib ako noong nabasa ko sa isang interbyu mo na kaya mong magsulat ng mahigit 20 iskrip sa isang upuan lang.

Pero nang maranasan kong magsulat para sa komiks (na isa sa maraming gawain noong nasa IBON Foundation pa ako), napansin kong makakaya ngang gawin ang maramihang pagsusulat sa loob ng isang araw (o kahit sa isang upuan). Mga lima o anim na *frames* lang kasi ang normal na nilalaman ng isang pahina, at ang mga dayalogo sa bawat *frame* ay kailangang gumamit lang ng kakaunting salita. Basta't malinaw ang iyong paksa, kaya mong ipaliwanag ang dapat na idrowing ng dibuhista sa mga *frame* at alam mo ang takbo ng istorya sa loob ng tatlo o limang pahina, kayang-kaya ng isang matiyagang manunulat ang pagsusulat sa komiks.

Sa kabila ng mahalagang puntong ito, nakakabilib pa rin ang 800 naisulat mong nobelang pangkomiks at walang debate sa iyong sipag sa pagsusulat. Oo, ikaw nga ang nagsulat, pero ang isyung ilang ulit na ibinato sa iyo ay kung ikaw ba ang nagdibuho ng karamihan sa mga ito.

Lumalabas na ang sagot ay hindi. Ayon sa manunulat at ilustrador ng komiks na si

Gerry Alanguilan, ang mga sumusunod ay nagdibuho sa mga akdang nakilala ka: Steve Gan (*Ang Panday* at *Pieta*), Nestor Malgapo (*Anak ng Lupa*), Mar Santana (*Bakekang*), Hal Santiago (*Kroko*) at Tor Infante (*Totoy Bato*).

Ang karangalang nais ibigay sa iyo ay para sa sining biswal (*visual arts*), hindi para sa literatura (*literature*) na kung saan maaaring isama ang pagsusulat para sa komiks. Hindi ko maubos-maisip kung bakit sinasabi mong karapat-dapat sa iyo ang parangal samantalang malinaw ang ebidensiyang wala kang dinibuho sa mga akdang nakilala ka.

Masyadong mababaw ang katwiran mong marunong kang magdrowing, at walang saysay ang ilang beses mong mabilisang pagdidibuho sa harap ng kamera para patunayan ang galing mo. Unang una, hindi ka naman binibigyan ng parangal sa kung anumang mabilis mong maidrowing sa harap ng kamera. Ang usapin dito ay ang kagalingan mo sa sining biswal batay sa mga nadibuho mo sa mga nakalipas na taon.

Ang katwiran mo, sobra-sobra naman ang hinihingi sa iyo kung aasahan ka pang magdibuho ng mga nobelang sinulat mo. Mas matagal magdibuho kaysa magsulat, at pinili mo raw ang huli. Simple lang ang argumento mo: Ang maramihang produksyon ng iskríp ay nangangahulugan ng mas malaking kita.

Ang isang Pambansang Alagad ng Sining ay dapat na nagbibigay ng positibong impluwensiya sa kabataan, lalo na sa mga nais maging artista ng bayan. Gusto mo bang ikintal sa isip ng mamamayan na ang pangunahing motibasyon sa pagsusulat ay kumita ng pera? Nasaan na ang paghuhubog at pagmumulat ng isipan?

Sa usapin naman ng pelikula, maraming nagsasabing terrible ang mga ginawa mo, lalo na ang tinaguriang *massacre films* na mas nais mong tawaging *justice films*. Anuman ang tawag sa kanila, paano napapaunlad ang kultura ng Pilipinas ng mga pelikulang tulad ng *Kuratong Baleleng* at *The Cory Quirino Kidnap Story*? Oo nga't pinilahan at kumita ang mga ito sa takilya, pero hindi naman ito usapin ng popularidad.

Kaya bang maihanay ang kahit isang pelikula mo sa husay ng *Orapronobis* (1989) at *Ganito Kami Noon, Paano Kayo Ngayon?* (1976) na ang mga direktor ay mga Pambansang Alagad ng Sining na sina Lino Brocka at Eddie Romero? Ito ay ilan lang sa mga pelikula nilang patuloy na pinapapanood sa mga estudyante (at lubhang kailangang ipalaganap sa mas marami pang tao) dahil sa malalim nitong mensahe sa kalagayan ng ating lipunan.

Duda ako kung may matinong propesor na magpapapanood ng pelikula mong *Tirad Pass: The Story of Gen. Gregorio del Pilar* (1997). Ano ba ang karapatan mong baguhin ang kasaysayan? Sa iyong pelikula, ang lider ng Katipunan na si Andres Bonifacio ay pinatay ng mga Kastila, samantalang alam nating malaki itong kabalintunaan. Hindi ko na iisa-isahin pa ang maraming kahinaan ng pelikulang ito. Pero kung ito ang sukatan ng kahusayan sa paggawa ng pelikula, lubhang naging mababa na ang pamantayan ng Malakanyang sa paggawad ng pinakamataas na karangalan ng bansa.

Sa puntong ito, dalawang hamon lang ang nais kong ibigay sa iyo.

Una, hikayatin mo ang Malakanyang na mag-organisa ng isang Carlo J. Caparas Film Festival na kung saan ipapalabas nang libre ang lahat ng iyong mga pelikula, lalo na ang tinatawag mong *justice films*. Kailangang imbitahin ang mga kilalang kritiko, direktor at artista hindi lang dito sa Pilipinas kundi sa iba't ibang bansa (sana'y makapunta ang mga katulad nina Quentin Tarantino at Ang Lee). Sa pagtatapos ng bawat *screening*, dapat na kunin ang opinyon nila sa husay ng iyong obra.

Ikalawa, ipalaganap mo ang lahat ng iskrip para sa mga komiks na sinulat mo. Alam kong napakarami kang sinulat, pero gusto kong malaman kung totoo ang kumakalat na balita sa Internet na ang tipikal na iskrip na ginawa mo noong dekada 1980 ay ganito:

- Frame 1. Same scene of last frame of previous chapter.
- Frame 2. Same scene pa rin, nag-uusap.
- Frame 3. Bahala ka na.
- Frame 4. Bahala ka na.
- Frame 5. Nagsuntukan.
- Frame 6. Change angle.
- Frame 7. Your angle.
- Frame 8. Bahala ka na.

Kung totoo ito, anong klaseng gabay ang binibigay mo sa iyong mga dibuhista?

Madali para sa iyong ipagwalang-bahala ang mga batikos sa iyo, lalo na ang simpleng dalawang hamon ko sa iyo. Pero tandaan mong sa pagtanggap mo ng titulong Pambansang Alagad ng Sining, habambuhay mong kailangang dalhin ang iyong papel at lapis para patunayang marunong kang magdibuho, na napakalaking kaibahan sa iba pang nanalo sa larangan ng sining biswal na walang kailangang patunayan.

Sa kaso mo, parating nasa likod ang batikos, at ang aking dalawang hamon ay may posibilidad na magpaparami pa ng mga kritiko mo. Sa huling pagsusuri, ang pinakapraktikal na solusyon ay huwag tanggapin ang titulong nais ibigay sa iyo ng Malakanyang, pero ayaw mo namang gawin ito.

Hay naku, bahala ka na nga!

Para makipag-ugnayan sa awtor, pumunta sa www.dannyarao.com.